

**Regional News Unit AIR Aizawl
Friday, September 27, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Ni 2 awh Commonwealth Parliamentary Association, India Region Zone - III Annual Conference vawi 21-na chu vawiin hian Aizawl ah tan a ni ang.**
- **Doordarshan Mizoram Indigenous Games 2024 Inter-Branch Competition, Lunglei District chu Lungleiah nimin khan tan a ni.**
- **Sawrkar laipui chuan inhlawhfaten nikhata an hlawh theih hniam ber bituk Minimum wage chu a tisang.**
- **Prime Minister Narendra Modia chuan nimin khan khawvela computer chak berte zing ami PARAM Rudra Supercomputer pathum chu Pune-ah a tlangzarh.**



COMMONWEALTH PARLIAMENTARY ASSN

Ni 2 awh Commonwealth Parliamentary Association, India Region Zone - III Annual Conference vawi 21-na chu vawiin hian Aizawl ah tan a ni dawn a, Lok Sabha Speaker Om Birla chuan khawmpui hi a hawng ang

Lok Sabha Speaker Pu Om Birla hi nimin khan Aizawl alo thleng a, Mizoram Speaker Pu Lalbiakzama, Lok Sabha MP Pu Richard Vanlalmangaiha, Chief Secretary Dr. Renu Sharma leh Official dangte'n an lo hmuak a ni.

Nizan khan Conference hmahruai atan Mizoram Legislative Committee Room-ah CPA India Region Zone III, Executive Committee Meeting Nagaland Speaker Pu Sharingain Longkumer, Chairman CPA India Region Zone III kaihhruiin neih a ni.

Meeting-ah hian North East Regional Institute of Parliamentary Studies And Research- NERIPSTR hnuai an hmalak tawhna te leh hmalak zel dan tur sawiho niin a bik takin university te nen a in-affiliate a, democracy rorelna leh parliamentary kalphung bakah India danpui constitution leh legislative drafting zirna lamah insawrbing tura hmalak ni se tih a ni.

NERIPSTR Director D. Pegu, Assam Legislative Assembly Secretary ni bawk chuan NERIPSTR building hmunhma leh society sum dinhmun sawiin, an Constitution 3rd Edition 2024 pharh a ni a, a tul anga siam danglam ngaite siamin member te'n an pawm tlang a ni.

Nizan thutkhawmah vek hian executive committee neih leh hun tur ngaihtuah niin nakum April thlaah Sikkim State-ah neih tura pawm a ni a. A hun leh ni chu a thlengtu Sikkim State remchanna angin nakum April thla chungin ruat ni se tih a ni.

Executive Committee Meeting-ah hian Mizoram Speaker Lalbiakzama, Assam state Speaker Biswajit Daimary, Tripura State Speaker Biswas Bandhu Sen, Sikkim state Speaker MN Sherpa, Arunachal Pradesh Speaker Tesam Pongte, Mizoram Dy Speaker Lalfamkima, Nagaland Dy Speaker S. Toiho Yeptho, Meghalaya Dy Speaker Timothy D. Shira, Sikkim Dy Speaker Raj Kumari Thapa te an tel a ni.



ICT

Information & Communication Technology (ICT) Department leh sorkar laipui National e-Governance Division (NeGD) buatsaihin nikhat awh 'Awareness and Sensitization Workshop on User Experience & Design System' nimin khan neih a ni a. ICT Minister Dr. Vanlalhlana chuan he hun hi a hmanpui a ni.

Dr. Vanlalhlana chuan NeGD, MeitY, atanga lokal mithiamte leh ICT Department-a thawktute'n workshop an buatsaih chu lawmawm a tih thu sawiin, department hrang hrang atanga official tel zawng zawngte'n an hlawkpui ngei a beisei thu a sawi a. Tunlai khawvelah website emaw, apps mipuite'n awlsam taka hman theih an mamawh tawh thu sawiin, hemi atana user interface/user experience pawimawh dante a tarlang a. Technology-in min khalh kal nasat tawh avangin, tuna website kan neih laite pawh mipuite tana a tangkai thei ang ber turin enkawl zui a tul thu a sawi bawk.

ICT Minister chuan information mamawh en nan Sawrkar website hrang hrangte a tlawh kual nasat thin thu sawiin, sawrkar website update lo, information pawimawh pawh dah mumallo leh enkawl tha tawklo an awm nual thu a tarlang a; kan website leh apps-te hi mipuite hman tangkai tur a nih avangin tan kan lak a ngai a ni, a ti a. ICT Minister a nihna ang pawhin official kalkhawmte hnenah ngenna siamin, website homepage mai nilo, a chhung thu leh information pawimawh update kawngah theihtawp chhuah thar a tul thu a sawi a. Department information pawimawhte, dan leh a kaihhnawihte leh notification/orders awm ang angte website-ah regular taka update-a mipui tana information pawimawh dahkhawmna hmun tha tak nei theuh turin a chah bawk.

He hunah hian Chief Informatics Officer, ICT Department Dr. Lalthlamuana chuan kalkhawmte lawmna thu sawiin, he nikhat awh 'Awareness and Sensitization Workshop on User Experience & Design System' chu kalkhawmte'n an hlawkpui ngei a beisei thu a sawi a, a bikin online services leh mobile applications hman tangkai mek leh la hman tangkai tur department-te tan phei chuan a pawimawh leh zual thu a sawi a ni.

He workshop hi thupui panga (5) ah then niin, Mizoram Sawrkar hnuaiia department hrang hrang leh a hman tangkai thei tur Mizoram chhunga Central Sawrkar Office-ten workshop chhimtu tur aiawh thahnem tak an tir a ni.



POWER MINISTER

Power Minister Pu F. Rodingliana Office Chamber-ah Solar Rooftop Scheme PM Surya Ghar Muft Bijli Yojana chu chak zawka kalpui dan tur sawiho in nimin khan P&E Dept Official-te leh Empanelled Vendor an thukhawm.

He meeting kaihruaitu Power Minister Pu F. Rodinglana chuan Mizoram sorkar in rooftop solar Kw 1 zelah Subsidy cheng 12,000 pek a nih tur thu sawiin, 10 KW thleng installation ti duh tan he subsidy hi pek a ni dawn a ti a. He scheme hnuaiah hian Central Sorkar chuan Kw 3 thleng subsidy pek sak theiin, KW 1 zelah cheng 33,000 subsidy a pe a. Hemi belhchhah nan hian State sorkar chuan subsidy hi a tum ve leh a ni. He scheme hmang tangkai duh, a tira senso tur sumlu neilo tan interest hniam tak in Bank Loan a lak theih dawn bawk a ni.

Meeting-ah hian zau zawk leh nasa zawka mipuite hnena he scheme zirtirna thehdarh dan tur sawiho niin, Department mai bakah vendor te chu scheme chungchang uar zawka mipuite hnena tlangzarh turin a rel a ni.

He Solar Rooftop Scheme hi India Prime Minister Pu Narendra Modi an February ni 29-a a tlangzarh niin, solar rooftop hmanga power tam zawk thar chhuahna tur leh mimal in (residential building) ten an kawlpheha mamawh an tharchhuah theihna tura ruahman a ni a.

Mizoramah chuan Power & Electricity Department (DISCOM) chu State Implementing Agency atan Central Ministry in a ruat a, Sorkar in tehfung hrang hrang paltlang Empanelled vendor a thlante hmangin mimal diltute hnenah solar rooftop installation hi tih sak tur a ni. Chenna in a vuah solar rooftop atanga energy siamchhuahte hi in neitute hman bak chu sorkar in unit khat cheng 4.80 zelin a lei let sak dawn a ni. Tun thlengin Mizoram bikah Empanelled Vendor 11 an awm tawh a ni.



DDK

Doordarshan Kendra (DDK) Mizoram, Mizoram Indigenous Games Association (MIGA), Young Mizo Association (YMA) Lunglei Sub-Headquarters leh Mizoram Journalists' Association (MJA) Lunglei District te thawk ho huaihawt ni hnih awt tur tualchhuak infiamna hmanga Lunglei Sub-Headquarters hnuaia YMA branch hrang hrangte inelna, "Doordarshan Mizoram Indigenous Games 2024 (Inter-Branch Competition, Lunglei District) chu Lungleiah nimin khan tan a ni a, Lunglei High Powered Committee (HPC) Vice Chairman Pu V. Malsawmtluanga MLA chuan Chanmari Hall-ah a hawng.

Pu V. Malsawmtluanga chuan hnam anga din chhuahna kawngah pi pute ațanga inhlan chhawn tualchhuak infiamna pawimawhzia sawiin, he'ng infiamnate hi hnam ziarang, incheina leh nun ze mawi chawi nungtu pawimawh tak a ni, a ti a. Kalphung thar, mipui sawrkarin a tum chu hnam anga a hlawma din chhuah a nih thu sawiin, chumi tihhlawhtlin nan chuan infiamna lama hmasawn turin hmunhna leh hmanraw țha ngaihtuah bakah, țhalaite theihna leh thiamna tipung tura hma lakna ruahman a nih thu leh thingtlang kilkhawr zawkah pawh zirtirtu țha tira hma lak tum a nih thu a sawi a. Lunglei District-ah pawh infiamna lama hma sawnna turin sawrkarin theih tawp a chhuah dawn tih sawiin, Lungleiah world class hockey field siam tura ruahmanna siam mek a nih thu a sawi a. Țhalaite chu zirna emaw, infiamna emaw, ei zawna emaw, kawng tinrengah mi baka thawh rim chu hlawhtlinna kailawn pawimawh ber pakhat a ni tih hre tura chahin, Zo nun ze mawi leh hnam ziarang pho chhuah leh chawi nunna hmanrua ni tura duhsakna hlan chungin tualchhuak infiamna hmanga inelna chu a hawng a ni.

Lunglei District-a DD Mizoram Indigenous Games 2024 hawnna inkhawm hi DDK Aizawl-a Programme Executive & MIG Producer Pu T. Siana chuan kaihruaiin, DD Mizoram Indigenous Games chu kumin February ațanga țanin district hrang hranga buatsaih a nih tawh thu leh Lunglei District chu district pakuaa an buatsaihna a nih thu a sawi a.

DD Mizoram Indigenous Games 2024 chu sawrkar laipui Ministry of Information & Broadcasting hnuaiia Broadcasting Infrastructure and Network Development (BIND) scheme kal tlanga buatsaih a nih thu a sawi.



DIST TB FORUM

Kolasib DC Conference Hall ah District TB Forum chu an Chairman Pu Robert C Lalhmangaiha, Kolasib DC hovin an thukhawm a, TB forum hmalak tawh dan leh chak zawka hmalakna kalpui dan tur an rel a ni.

Thutkhawmnaah hian Chairman, Kolasib DC, Pu Robert. C Lalhmangaiha chuan thu sawiin, India sawrkar chuan kum 2025 ah TB umbo a tum a, chuvang chuan he umbo hna thawk tur hian theihtawp kan chhuah theuh a ngai a ni, a ti a. Chu mawhphurhna chu TB Forum chungah a inngat lian hle a, chuvang chuan TB dona kawnga an thawhna ah tan la turin a chah.

Sr CMO Dr RK Lalthlamuana pawhin thu sawiin, TB chu natna darh awlsam tak a nih avangin a zawnchhuah leh enkawl hna pawh uluk leh fimkhur taka kalpui ngai a ni, a ti a. Kumin August thla thleng khan Kolasib District a VC 56 zinga VC 30 te chu TB free village ni thei tura eligible an la ni, a ti a. TB free village a puang tur hian mi 1000 ah mi 30 tal test an ngai a, chung zinga 1 aia tam TB vei an awm chuan TB free village a puan theih an ni lova, chuvang chuan theihtawp chhuah a tanlak leh zual a ngai a ni, a ti.

He thutkhawmnaah hian TB chungchanga hma lak dan tur ngaihtuahin Kolasib district chu TB Free District a nih theih nan District chhunga khaw hrang hrang Village council te kaltlangin TB chungchang inhrilhhriatna neih nise tih te, Home dept enkawl lai district jail, 1st IR Battalion Hq Mualvum te, Vairengte a IR duty te leh Excise duty te zingah Awareness neih nise tihte, hei bakah hian TB vei mek ten treatment an lak laia eitur tha an neih theih nan Nikshay Mitra (Community support of TB Patients) atam thei ang ber an awm theih nan Kolasib khawpui chhunga Office hrang hrangah ngenna siam nise an ti bawk.

Kumin chhungin Kolasib district ah TB vei rinhlelh mi 1703 sample test niin, TB vei hmuhchhuah mi 144 an awm a, tun dinhmunah Kolasib district ah TB vei enkawl lai mi 94 an awm mek a ni.



MINIMUM WAGE

Sawrkar laipui chuan inhlawhfaten nikhata an hlawh theih hniam ber bituk Minimum wage chu a tisang. Variable Dearness Allowance hi sawrkar chuan ennawnin hlawhbi tuk thar ber hi October ni 1 atanga hman tan tur a ni a. Minimum wage hi an thiamna milin then a ni a, Unskilled, semi-skilled, skilled leh highly skilled te then niin an chenna hmun milin area A,B leh C ah te then sawm leh a ni. Sawrkarin a ennawn hnuah hlawh bituk thar berah cuan area A a thawk insakna, hmunphiat, in tifaitu leh puak phurte tan nikhatah minimum wage hi cheng 783 a ni a. Semi-Skilled te tan nikhatah cheng 863, skilled, clerical leh watch&ward te tan nihkhtah cheng 954 a ni a. Thiamna sang bik nei highly skilled workers tan hian nikhatah cheng 1035 a tihsan a ni bawk.



SUPER COMPUTER

Prime Minister Narendra Modia chuan nimin khan khawvela computer chak berte zing ami PARAM Rudra Supercomputer pathum chu Pune-ah video conference kaltlangin a tlangzarh. Hei bakah hian Pu Modia hian High-Performance Computing (HPC) system a tlangzarh bawk a. HPC hi khawchin leh sik leh sa zirchianna atana hman tur a ni ang. Thusawiin Pu Modia chuan Param Rudra Supercomputer leh HPC system nen India chuan mahni intodelh kawngah rahbi pawimawh tak a rap tan ih sawiin science leh technology lama ngaihtuahna thar hman kawngah kawng thar a sial dawn a ni a ti a. India tan chuan science and technology lama hlawhtlinna ropui tak a ni a ti bawk. PARAM Rudra Supercomputer pathum hi a vaiin cheng vaibelchhe 130 man an ni a. National Supercomputing Mission hnuaiia siam niin Pune, Delhi leh Kolkatta ah te bun an ni.



PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

